



Province of the
EASTERN CAPE
EDUCATION

**NATIONAL
SENIOR CERTIFICATE**

IBANGA 12

SEPTEMBER 2012

ISIXHOSA ULWIMI LWASEKHAYA – P2

AMANQAKU: 80

IXESHA: 2½ iiyure

Olu viwo lunamaphepha angama – 21.

IMIYALELO NENGCACISO

1. Nceda ufunde le miyalelo phambi kokuba uqale ukuphendula imibuzo.
2. Musa ukuzama ukufunda lonke iphepha. Jonga kwisiququlatho esikwiphepha elilandelayo uze uchonge imibuzo ebuzwe ngeetekisi ozifundisiweyo kulo nyaka. Emva koko yifunde le mibuzo uze ukhethe leyo unqwenela ukuyiphendula.
3. Eli phepha linamacandelo amaThaThu:

ICANDELO A:	Isihobe	(30)
ICANDELO B:	Inoveli	(25)
ICANDELO C:	Idrama	(25)
4. Landela imiyalelo esekuqaleni kwicandelo ngalinye ngocoselelo.
5. Kulindeleke ukuba uphendule imibuzo emihlanu iyonke:
Imibuzo emithathu kwicandelo A; omnye kwicandelo B nomnye kwicandelo C.
Sebenzisa uluhlu lokukhangela (itshekhlisti) olukwiphepha lesine lokukunceda.
6. Nombola iimpendulo zakho ngokwendlela ekunonjolwe ngayo imibuzo kwiphepha lemibuzo.
7. Icandelo lemibuzo ngalinye liqale kwiphepha ELITSHA.
8. Bhala ngokucocekileyo nangokucacileyo.
9. Yaba ixesha lakho ngolu hlobo:

ICANDELO A:	malunga nama – 40 emizuzu
ICANDELO B:	malunga nama – 55 emizuzu
ICANDELO C:	malunga nama – 55 emizuzu

Iphepha lesiqulatho

Eli phepha liza kunceda abafundi bakwazi ukukhetha imibuzo abafuna ukuyiphendula ngaphandle kokufunda lonke iphepha.

ICANDELO A: ISIHOBE		
Imibongo emiselweyo: Phendula NAYIPHI na imibuzo emiBINI		
INOMBOLO YOMBUZO	UMBUZO	AMANQAKU
1. (UNkosana “The Happyboy” Mgxaji)	Umbuzo omde	10
OKANYE		
2. (Izifo zabantwana)	Umbuzo omfutshane	10
OKANYE		
3. (Aphi na amadoda!)	Umbuzo omfutshane	10
OKANYE		
4. (UProfesa A. C. Jordan)	Umbuzo omfutshane	10
Umbongo Ongamiselwanga: Phendula NAWUPHI OMNYE		
5. (Ukuthetha)	Umbuzo omde	10
OKANYE		
6. (Ukuthetha)	Umbuzo omfutshane	10

ICANDELO B: INOVELI		
Phendula umbuzo OMNYE .		
7. (Nyana Wam! Nyana Wam!)	Umbuzo omde	25
OKANYE		
8. (Nyana Wam! Nyana Wam!)	Umbuzo omfutshane	25
OKANYE		
9. (Ukhozi olumaphiko)	Umbuzo omde	25
OKANYE		
10. (Ukhozi olumaphiko)	Umbuzo omfutshane	25

ICANDELO C: IDRAMA		
Phendula umbuzo OMNYE .		
11. (A-a-a! Jongumsobomvu)	Umbuzo omde	25
OKANYE		
12. (A-a-a! Jongumsobomvu)	Umbuzo onmfutshane	25
OKANYE		
13. (Amaza)	Umbuzo omde	25
OKANYE		
14. (Amaza)	Umbuzo omfutshane	25

QAPHELA:KUMACANDELO B no C, phendula umbuzo omde omnye nombuzo omfutshane omnye.

Itshekhlisti:

Kunyanzelekile ukuba uqwalasele olu luhlu lulandelayo ukuze uqiniseke ukuba ukhethe imibuzo ngendlela eyiyo.

ICANDELO	AMANANI EMIBUZO	INANI LEMIBUZO EMAYIPHENDULWE	TIKISHA NGASEZANTSI
A: Isihobe (imibongo emiselweyo)	1–4	2	
A: Isihobe (Umbongo ongamiselwanga)	5–6	1	
B: INoveli (umbuzo omde OKANYE umbuzo omfutshane)	7–10	1	
C: Idrama (umbuzo omde OKANYE umbuzo omfutshane)	11–14	1	
QAPHELA: KumaCandelo B no C, phendula umbuzo omde ube mnye nombuzo omfutshane omnye.			

ICANDELO A: ISIHOBE**IMIBONGO EMISELWEYO****VUKANI MADODA KUSILE – IZIBONGO NAMANQAKWANA: Inggokelela yababhali**

IMIYALELO: Kweli candelo kubuzwe imibongo emiNE emiselweyo nemiBINI engamiselwanga.

Umlingwa kulindeleke ukuba aphenhule imibuzo ebuzwe kuyo nayiphi na imibongo okanye naziphi na izibongo ezimiselweyo; KUNYE nombuzo omnye kumbongo ongamiselwanga.

QAPHELA: Umbuzo ongombongo ongamiselwanga KUNYANZELEKILE ukuba uwuphendule. Qiniseka ukuba uphendule imibuzo emithathu kweli candelo.

UMBUZO 1 (Umbuzo omde)

Fundisisa lo mbongo ulandelayo ngocoselelo uze ucazulule indlela ethi imbongi simncede ngayo uMgxaji isakhono sakhe emanqindini.

[10]

UNkosana “The Happyboy” Mgxaji: N. Thuthani

- 1 Ebesithi elapha abe phaya eqongeni,
- 2 Esenz'amadanyadanya edlala ngeenyawo,
- 3 Etyibilika eqongeni esebenzis'iinyawo ngomtsalane omkhulu.
- 4 Elibhanx'ixhoba enguphuncuka-bemphethe,
- 5 Loo matshamba ebukeka, elingqul'ixhoba!

- 6 Zalwa zizijul'ijacu yem'entla into kaMgxaji
- 7 Ebesith'akudibana nembethi-manqindi elolu hlobo,
- 8 Amelane nayo, ayiqhath'ibe sisitunxa,
- 9 Akudibana nenjeya azijike afane nayo angaxakeki
- 10 De aqaqambe asamel'ekhuph'ezikrakra izithonga
- 11 Yakuxhom'umgangatho awuxhome de athi vetshe
- 12 Kulaph'ibikhon'imfihlelo yesakhono sakhe.

- 13 Xa igqugqisil'ekhaya yakhonjwa kwezaphesheya,
- 14 Yabhong'igqubel'ezaphesheya kwamanz'iinkunzi,
- 15 Yacel'umngeni nakwezo izidaphula ngophondo,
- 16 Kungugqwaka-gqwaka zakuhlangana ngeempondo,
- 18 Ivova into kaMgxaji eqongeni iphatha kunkqwila-nkqwila.
- 19 Awukubonang'ukutshila kwentambanani,
- 20 Wen'ungakubonang'ukunkqwila-nkqwila kukaMgxaji
- 21 Ephepha-phepha edlal'ezintanjeni ephephuka,
- 22 Eligang'iqonga ee jaju phaya ngobuchul'obumangalisayo,
- 23 Athi cebu kuhle aphashe kuvova,
- 24 Ekhulul'imvula yamanqindi ngokuthawuza
- 25 Wayibek'iMonti emagqabini nakubeni bengayifuni

OKANYE

UMBUZO 2 (Umbuzo omfutshane)

Yonwabela lo mbongo ulandelayo uze uphendule imibuzo elandelayo.

IZIFO ZABANTWANA: W. Shasha

- 1 Kuthi mandithethe ndide ndithintithe ngezifo zabantwana!
 2 Kuthi mandinithuke ndinithakathe ngezifo zeli lizwe!
 3 Le nt'izifo zabantwana zizizifo zohlanga.
 4 Bharha mz'oSunduku ukub'usapho lwakho luziintsalu,
 5 Bharha mzi kaXesibe ukub'umntwan'esiswin'uxwesile!
 6 **Koba nini na siyintlekisa ezintlangeni?**
 7 Ngokuba sizalwe, sidle, sihluthe, sife!
- 8 Litsolil'ilizwi lalath'eGoli phantsi komhlaba,
 9 Butyebi bale mihla yigolide nedayimani,
 10 linkab'ezimaxhaka zakwaXhosa zibuthisile
 11 limaz'ezibhonx'amabele zamaXesibe zaphusile,
 12 Ivila lenqenerha loxhatshazwa yindlala,
 13 Ndod'ehlel'ecal'kothango yocholwa yirhafu
 14 Yindedeba engenakuba nabhokhwe yambeleko
 15 Ngcango zakwaTebha zivulwe zayekwa,
 16 "Umfazi phantsi-indoda phezulu"
 17 Batsho benyhibhel'inyhobha-nyhobha kwesejoyini.

- 2.1 Xela ukuba uphawu lwesikhuzo olusetyenziswe kumqolo 1 lunika luvo luni malunga nemo mphefumlo yembongi. (1)
- 2.2 Kwisitanza soku-1 chonga umqolo otolikwa zezi nkcaza zilandelayo;
- 2.2.1 Ukungahambi ngendlela efanekileyo kwezinto. (1)
- 2.2.2 Ukungabi nantshukumo siyenzayo ebomini bethu. (1)
- 2.3 Cacisa esi sihloko, "Izifo zabantwana" ngokuveza le ntsingiselo isitheleyo. (1)
- 2.4 Chaza ukuba olu thelekiso lwalathwa yimbongi kwimiqolo 9, 10 no 11 malunga nezozoqosho lukuxelela ntoni. (1)
- 2.5 Cacisa ukuba isafobe esibhalwe ngqindilili kumqolo wesi- 6 sisetyenziselwe ukuphuhlisa ntoni. (2)
- 2.6 Nika imizekelo ibe MIBINI yeenzima ezibangelwa yile nguqulelo yezozoqosho ixelwa embongweni. (2)
- 2.7 Hlobo luni lophindaphindo olufumaneka ekuqaleni kwimiqolo 4 no 5? (1)

[10]**OKANYE**

UMBUZO 3 (Umbuzo omfutshane)

Funda lo mbongo ulandelayo uze uphendule imibuzo esekwe kuwo.

APHI NA AMADODA! : M. Mbuthuma

1 Ivelil'inyok'enkulu
 2 Egqib'umzi wonk'uphela,
 3 Nants'ithe ga ngogaga
 4 Kwizigingqi zomzi kaNdaba;
 5 Hay'ukuswel'amandla
 6 Ngendikhe ndiyijijise.

7 Hay'ukuswel'izixhobo
 8 Ngendikhe ndiyibonise.
 9 Xa kunje se ikokwenu:
 10 Thambodala sondelani!
 11 Woz'utshabalal'umzi
 12 Kulityelwe lutyhwatyho.

13 Zemk'iinkomo, magwala,
 14 Nt'ezifungel'efileyo,
 15 Nt'ezijong'owaz'umqala,
 16 Zilibal'iintsana zazo,
 17 Amagwal'anezishwabulo
 18 Zeminyanya engookhokho.

19 Nohlala nibekw'ityheneba
 20 Zizizukulwana ezizayo:
 21 Yibulalen' inyoka, madoda,
 22 Yod'iawafukam'amaqanda-
 23 Kant'ayaziwa konke-konke
 24 Ukuthi yoqandusela silo sini na.

- 3.1 Nika intsingiselo engathiwanga pahaha yegama “inyoka” ekuthethwa ngayo kulo mbongo. (2)
- 3.2 Lo Ndaba kuthethwa ngaye kwisitanza soku-1 ngubani kwaba balandelayo? Khetha impendulo echanekileyo kwezi zilandelayo:
- 3.2.1 Ngusibonda
 3.2.2 Yinkosi yabaThembu
 3.2.3 Liphakathi (1)
- 3.3 Chaza ukuba esi sihloko sisetyenziswe ngayiphi injongo? (1)
- 3.4 Ngowuphi lo mzi imbongi ithetha ngawo kulo mbongo? (1)
- 3.5 Chonga kwisitanza soku-1 umqolo obonisa ukuba le nyoka seyingene yaphela. (1)

- 3.6 Ngokwakumqolo 15 ucinga ukuba umbhali uthetha ukuthini? (1)
- 3.7 Ucinga ukuba umbhali wayephila kuliphi ixesha eMzantsi Afrika ngokwalo mbongo? (1)
- 3.8 Caphula umqolo otolika le nkcaza “Ukusoloko ugxeke” kwisitanza sesi-4. (1)
- 3.9 Ngokukhokhelwa sisitanza sesi-3 beka sihloko simbi endaweni yesi. (1)
- [10]**

OKANYE

UMBUZO 4 (Umbuzo omfutshane)

Funda lo mbongo ulandelayo uze uphendule imibuzo elandelayo.

UPROFESA A. C. JORDAN: Z. S. Qangule

- 1 Uvakele ubham wokuwa komthi,
- 2 Kwahlokoma amawa ezizwe ezikude,
- 3 Kwanga kudlula umoya wezixhobo,
- 4 Kwanga kukhasa umoya wentlambo
- 5 Bathi kufanele iminyanya iwelile,
- 6 Zazola iilwandle zanika imbeko,
- 7 Yana imvula ayenza nangxolo.
- 8 Izigalo zegorha namhla ziwile,

- 9 Iminwe yeqhawe namhla iyekile,
- 10 Amehlo acimele abona ekudeni.
- 11 Imiqulu nantso ithe xazalala,
- 12 Qoqosha lusapho lilifa lakho,
- 13 Indedeba kaloku ibizidla ngawe,
- 14 Iduna kaloku belibilela wena.

- 15 Ndithi imkile **inqeberhu** yakwaXhosa,
- 16 Kuthiwa kumnyama kwizwe labangekhoyo,
- 17 Kudingwa izikhuthali ezidume ngomonde,
- 18 Kucelwa amadoda agqumza ngeentonga,
- 19 Amachule acheba acubungule nomsonto,
- 20 Izinto eziphaka oko zikuphekileyo,
- 21 Izinto ezisela isiselo senyaniso.

- 4.1 Hlobo luni lo mbongo olu? Zixhase. (2)
- 4.2 Caphula umqolo kwisitanza-2 obonisa ukuba nokuba okaJordan akasaphili kodwa imisebenzi yakhe yohlal'ihleli. (1)
- 4.3 Zingalilifa njani iincwadi ezibhalwe ngumntu kubantwana bakhe? (1)

4.4 Igama elibhalwe ngqindilili ngokokusetyenziswa kwalo kulo mbongo ingaba lithetha yiphi kwezi zilandelayo:

- 4.4.1 Umntu obalulekileyo
- 4.4.2 Umntu onezoso
- 4.4.3 Umntu oxakileyo

(1)

4.5 Ngqamanisa umqolo OKULUHLU A nenkcaza EKULUHLU B.

ULUHLU A	ULUHLU B
4.5.1 Amachule acheba acubungule nomsonto	A Usondlile ngakubhalileyo.
4.5.2 Iminwe yeqhawe namhla iyekile	B. Isiphiwo sobukrelekrele, umonde nokukwazi ukucazulula izinto
	C. Imisebenzi ebeyenza iphelile

(2)

4.6 Amazwi akrwelelwe umgca ngaphantsi kwisitanza sokugqibela ingaba ngawokuncoma okanye ukunikezela?

(1)

4.7 Chaza ukuba kungani na ukuba imbongi isebenzise indalo kakhulu kwisitanza soku-1 xa ithetha ngokufa kuka A. C. Jordan.

(1)

4.8 Nika umfanekiso ngqondweni oboniswa sisifanekisozwi "bham".

(1)
[10]

KUNYE

UMBUZO 5 (Umbuzo omde)

Funda lo mbongo ulandelayo ngocoselelo uze ucacise indlela umbhali abonisa ngayo icala elihle nelibi lokuthetha kulo mbongo.

UKUTHETHA: N. S. V. Zamela

- 1 Sisipho semvisiswano nomanyano
- 2 Yinkunzi nemazi kwizitshixo
- 3 Yincukuthu nentsika kwindalo
- 4 Kukungqisha komntu nendalo
- 5 Yimvumelwano yembono nolwimi
- 6 Sisiseko sobuntu noxolo
- 7 Ngumbongo ochaz'ukubona komntu
- 8 Iluncomo-gxeko lwezinto nendalo.
- 9 Kodwa kwakhona kuzonil'izinto
- 10 Kuba kuzikhuphil'izizathw'ezingaphilanga
- 11 Kuzidubul'iimeko zoxolo nemvisiswano
- 12 Kuzibhentsisil'iintliziyw'ezonakeleyo
- 13 Kuzibizil'iimfazw'ezininzi zomhlaba
- 14 Kuba kona kwandulel'izenzw'ezihle nezibi.

OKANYE

UMBUZO 6 (Umbuzo omfutshane)

Phendula imibuzo esekwe kumbongo ongasentla.

- 6.1 Khetha kulo mbongo umqolo obonisa ukungaqiniseki kweziphumo zokuthetha. (1)
- 6.2 Xela ingcamango equlethwe yimiqolo emithandathu yokugqibela. (1)
- 6.3 Caphula kulo mbongo umqolo obonisa uchasaniso. (1)
- 6.4 Xela ukuba isihlanganisi u“Kodwa” esisetyenziswe ekuqaleni kumqolo wesi-9 sisetyenziselwe ntoni? (1)
- 6.5 Nika uhlobo lwesafobe **esibalaseleyo** kwimiqolo esibhozo yokuqala. (1)
- 6.6 Shwankathela imiqolo yokuqala esibhozo ngezivakalisi ezibini nje kuphela. (2)
- 6.7 Kula macala mabini okuthetha avezwa ngumbhali, wena ukhetha liphi? Ngasiphi isizathu? (2)
- 6.8 Imvano siqalo kwimiqolo 11,12 no13 ebonakaliswe ngokukrwelelwa umgca ngaphantsi isetyenziselwe ntoni? (1)

[10]

ICANDELO B: INOVELI**IMIYALELO**

- Kweli candelo kubuzwe iinovele ezimbini.
- Khetha imibuzo kwinovele oyifundisiweyo.
- Kwinovele nganye kubuzwe imibuzo emibini, omde nomfutshane, ukususela kumbuzo wesi – 7 ukuya kumbuzo 10.
- Khetha umbuzo ube mnye uwuphendule.
- **QAPHELA:** Ukuba ukhethe umbuzo omde kwinovele, khetha omfutshane kwicandelo C.
Ukuba ukhethe umbuzo omfutshane kwidrama, khetha umbuzo omde kwicandelo B.
- Ubude bombuzo omde buphakathi kwama-340 nama-390 amagama.

UMBUZO 7 (Umbuzo omde)**NYANA WAM! NYANA WAM! : W. T. Tamsanqa**

Liyinene elithi impumelelo yomntu ngamnye isezandleni zakhe. Nggina olu luvo ngeziganeko ezisencwadini ngokubhekiselele kuTholelegqwirha, ubonise imingeni adibene nayo kodwa waphumelela ebomini.

[25]**OKANYE****UMBUZO 8 (Umbuzo omfutshane)**

Funda ezi zicatshulwa zilandelayo uze uphendule imibuzo elandelayo.

ISICATSHULWA 1

Hayi ke yanguwashiywa ukuya ezimotweni nasezibhasini, yalukrozo iimoto ukusuka eKempton Park apho iJan Smuts ikhona ukuya kuqabela eRhawutini. Ngomzuzwana omncinci kwakhala ibhungane esikhululweni eJan Smuts kodwa abanye basala beziindwane belimele kukuxovulwa ngabanye. Isihlanu sona itshoba lalala umbethe, yathutha ithuthile inqwelo yezigulane ukusa esibhedlele.

Akuzange kube kudala befikile e-Albert Street lazala lema ngeembambo elo laseWesile abantu bengena bengaba bayagityiselwa besukela iindawo zokuhlala, abanye abazange babenakho kwa ukungena oko bakhala bephandle besithi, "Yhini! oku kokumbona nje ngeliso," kwaye kungekho kunceda. UThozama yena namaqabane akhe babona obo buphithi-phithi eJan Smuts esikhululweni baqonda ukuba akungangabo baphindela emotweni yabo basinga esibhedlele bexoliswe kukubona ukuba ufikile. Yathi ukuba izale indlu bazenza iintetho zabo ezimfutshane oonyawo-ntle boMzantsi abaNtsundu nabaMhlophe besithi, "Asikamankeli, asikambulisi sisambona nje".

Waye umntu omameleyo nobukeleyo esithi, "Yhini! na angakhe anikwe ithuba athethe sikhe sive nje oku kwelizwi lakhe."

- 8.1 Xela igama lesi sibhedlele uThozama nabahlobo bakhe basinga kuso. (1)
- 8.2 Chaza ukuba kungani abantu belangazelela ukumbona lo kuthethwa ngaye. (2)
- 8.3 Nika amagama abefundisi abaBINI ababalulekileyo nababekho kuloo nginginya yayiseJan Smuts. (2)
- 8.4 Chaza ukuba lo ubuyayo uvela phi, ebeye kwenza ntoni kuloo ndawo avela kuyo. (2)
- 8.5 Caphula kwesi sicutshulwa amagama atolikwa zezi nkcaza zilandelayo:
- 8.5.1 Kwakugcwele kungekho nendawo.
- 8.5.2 Ngesaquphe akwabikho bantu. (2)
- 8.6 Chonga isaci kumhlathi wokuqala kwesi sicutshulwa uze unike nentsingiselo yaso ngokwalo mxholo. (2)
- 8.7 Nika igama esele ibizwa ngayo iJan Smuts kule mihla. (1)
- 8.8 Intetho ebhalwe ngqindilili kwisicutshulwa ibonisa ukulangazelela ukuba uMangaliso athethe. Sebenzisa ulwazi lwakho lwencwadi uze uxele imizekelo ibe MIBINI yemibandela awayesakuzibalula kuyo uMangaliso ngexesha esenza intetho kwiingqungquthela zabafundi. (2)
- 8.9 Waqalisa phi ukulusabela ubizo lwakhe uMangaliso akuba ebuyele eMzantsi Afrika? (1)

[15]

ISICATSHULWA 2

Asingezise sanaba kakhulu sichaza uvuyo olwaba kwaFikizolo mhla wafika uMangaliso engumfundisi ehamba noyise, befika kuNofundile owayecinga ukuba indoda yakhe kudala yafa njengoko nendoda yayicinga ukuba umfazi wayo wafa .

Ungasowuzizobela owakho umfanekiso. Mna ndingasuka nje ndithi yaba lolo vuyo lwalukhatshwa ziinyembezi.

Wayiwisa etyetyisiweyo umfo wasemaKhomazini ikhatshwa liqela leegusha.

Lafa ilitye nembokotho elimeme lonke iZazulwana. Izihlobo ezikwiindawo ngeendawo kwanezifundiswa zeli loMzantsi Afrika ziphume ngendlu. Elilisela ngelizwi elinye umfo kaBhungalipheli esithi, “Vuyisanani nam.”

Abanye abantu bayazenza izinto ezintle kodwa abaze bazibone iziqhamo zemisebenzi yabo kuba zithi ziqandusele okanye ziqaqambe sebefile kodwa apha ekwenzeni uMangaliso umntu waba nethamsanqa uFikizolo kuba iziqhamo zemisebenzi yakhe wazixhamla esaphila. Banoyolo abathi bazixhamle iziqhamo zezithukuthuku zabo besaphila.

- 8.10 Esi siganeko sokuwiswa kwetyetyisiweyo asiqali kwenzeka ngokwalapha kwelibali. Xela ukuba besikhe senzeka nini? (1)

- 8.11 Xela ukuba esi siganeko kubuzwe ngaso apha ngasentla sitolika ntoni malunga nenkcubeko yethu maXhosa. (1)
- 8.12 Ingaba la magama abhalwe ngqindilili athetha ukuthini? (1)
- 8.13 Chaza ukuba umqolo okrwelelwe umgca ngaphantsi unika luphi uluvo. (1)
- 8.14 Nika imizekelo ibe MIBINI yezidanga anazo uMangaliso ukungqina ukuba wayesisifundiswa. (2)
- 8.15 Sele sixelelwa ngoMangaliso ofika kwaFikizolo ehamba noyise badibene phi kwaye bedibene njani? (2)
- 8.16 Kolu hambo lokubuyela ekhaya uqale wagqitha phi uMangaliso akuba eseGcuwa phambi kokuba aye kwaFikizolo? (1)
- 8.17 Xela ukuba ngokwesi sicutshulwa libe yintoni igalelo alenzileyo uFikizolo ebomini bukaMangaliso. (1)

[10]
[25]

OKANYE

UMBUZO 9: (Umbuzo omde)

UKHOZI OLUMAPHIKO: N. Saule

Umzabalazo asiyondlwan'iyane kuba ubomi bakho busemngciphekweni wokufa kodwa ofunga angajiki uyabuyekwezwa ekugqibeleni. Ujonge uMfazwe bonisa ubunyani bolu luvo uthathela mhla wathatha isigqibo sokuwela imida alifulathele ikhaya lakhe de abe uchophela ityala likaFriday.

[25]

OKANYE

UMBUZO 10: (Umbuzo omfutshane)

Funda ezi zicutshulwa zilandelayo uze uphendule imibuzo elandelayo.

ISICATSHULWA 1

“Uza kwenzakala kuloo ndlela uyithathayo.” Yayililizwi elirhabaxa lendoda, lisitsho kude kufutshane nam. Ndaqwanya ndajonga ngasentla, hayi andabona mntu, utsho phi bethu?

“Ndihambe ngaphi ke?” cwaka. Tyhini, uyokutshona phi na lo mntu? Kwathi qatha ukuba makabe akafuni kuthetha, ngoko ke mandimkhokele. Ndalathe ezantsi, kwam, “ndihambe ngapha?” Yabuya ngoko nangoko impendulo, “hayi!” Ndalathe ngasekunene, wathi hayi kwakhona, nangasekhohlo waphinda walandula. Ndalathe entla kwam, “heke, nyuka ngolo hlobo.” “Njani, kungekho ndlela nje?” Ndabuza ndingxamise. “Nyuka wena iza kubakho indlela.”

“Uphi wena?” Yabuya impendulo isithi “ndilapha” ndabe mna ndingaboni kwanto. Ndigwencele eliweni ndanyuka izicalu zamatye athe nkqo. Ukuqabela amawa nokunyuka imithi yayiyinto esasiyenza sisengamakhwenkwana, kangangento yokuba saside sikhuphisane ngokunyuka eyona ndawo iphakamileyo kulaa ntaba kaQaka. Lwaluneengozi ke nolu khuphiswano esasilunyukiswa njalo ngalo.

- 10.1 Ngoobani aba bathetha kwesi sicutshulwa? (2)
- 10.2 Uphi lo mlinganiswa ngeli xesha eva eli lizwi? (1)
- 10.3 Xela ukuba abantu ababhacayo babesebenzisa luphi uhlobo lwesithuthi. Nika isizathu sempendulo yakho. (2)
- 10.4 Sele esiva eli lizwi nje lo mlinganiswa uphumeleni kwisithuthi ebekhwele kuso? (1)
- 10.5 Nika igama lendawo eza kuba sisiphelo solu hambo lude kangaka luthatyathwa ngulo mlinganiswa kwaye kulawula wuphi umbutho kule ndawo? (2)
- 10.6 Yinyani okanye bubuxoki xa esi sithethi sisithi, “inengozi ke le ndawo uze kuyo”. Zixhase. (2)
- 10.7 Chaza ukuba uphethe enikwa ntoni lo mlinganiswa sesi sithethi sala mazwi angasentla? Kwaye esi siphosibe luncedo njani kulo mlinganiswa. (2)
- 10.8 Xela ukuba lo mlinganiswa uphinde wadibana naso phi esi sithethi ngokwalapha ebalini. (1)
- 10.9 Lo mlinganiswa uthabatha olu hambo akabonakalisi ephethe mpahla njengamntu useluhambeni. Chaza ukuba kungani. (1)
- 10.10 Ukhe wakhwazwa kanobom ngamakhwenkwe athile lo mlinganiswa esekolu hambo ndaweni ithile. Ebemkhwaza esithini? (1)

[15]

ISICATSHULWA 2

“Masithembe uyeza ngenene tat’uQhinebe. Usale kakuhle!” Ndandimazi uNdikho. Yenye yeentwana ezafika mva eMthontsi. Andinakuze ndilalathe ingcwaba lakhe kulawa aseMthontsi, kodwa likuwo.

Yatsala inqwelo yamahilili.

“Kungcono ukufa kunokuba ingqondo yakho igcine umfanekiso onje.” Loo mazwi kaSiphiwo andihlala ndada ndaya kufika esikhululweni eBholo. Akukho namnye umfanekiso owawufuna ukucima engqondweni. EBholo itreyini yafika ezinzulwini zobusuku, yaba ndim ndedwa umntu ohlayo. **Emgangathweni wabakhweli** kwakuthe cwaka, kungabonakali nomthinzi. Bayephi abantu?

Ngethamsanqa kwakungabandi kuba kwakusehlotyeni, iinkwenkwezi zazikhanyise isibhakabhaka, elo litha laza kuhlaba emhlabeni ezantsi. Iimvula zehlobo zazingekafiki ncam, imithi isawabonisa amanxeba obusika. Kwakungekho nampahla ingako ndinayo, ndingazi kusindwa nto ke kuloo ndlela iya kwaQaka. Ndithe xa ndiphuma esitishini kwabe kufika imoto engxamileyo. YayinguSiphiwo. “Nguwe lo Mfundisi kudala ndiquqa apha kwesi sitishi okoko sabuyayo. Besendinexhala ndisithi akusabuyi, mhlawumbi ucholwe lixhegwazana langaphaya eMgazi”.

Wayethetha uSiphiwo engaphumli engandibuzi nempilo le. “Kukuthini ukuthetha ngolu hlobo Siphiwo wakugqiba ukuba ngumfundisi? Kutheni khona ndizokuphuthunywa nguwe nje?”

- 10.11 Xela ukuba lo mbutho iNtsimb’ebomvu ungawunxulumanisa nawuphi eMzantsi Afrika kule ilandelayo:
- 10.11.1 Azapo
 - 10.11.2 Umkhonto weSizwe
 - 10.11.3 I. F. P. (1)
- 10.12 Beka gama limbi elikumxholo wesicatshulwa endaweni yalawo abhalwe ngqindilili. (1)
- 10.13 Xela ukuba lo Siphiwo uthetha nomfundisi baqale phi ukwazana? (1)
- 10.14 Yahlula aba befundisi babini kuthethwa ngabo apha. (2)
- 10.15 Ngokwencoko yesi sibini kubonakala kubuywa ndaweni ithile. Chaza ukuba kubuywa phi? (1)
- 10.16 Sebenzisa ulwazi lwakho lwencwadi uze uxele indlela ebebizwa ngayo uMfazwe ngooThembekile. (1)
- 10.17 Chaza naziphi na izinto eziNTATHU awathi uSiphiwo wazixelela lo mlinganiswa aye kumphuthuma ukufika kwakhe kwamfundisi uHlathi. (3)

[10]**AMANQAKU ECANDELO B: 25**

ICANDELO C: IDRAMA**IMIYALELO**

- Kweli candelo kubuzwe imibuzo kwiidrama ezimbini, ukususela kumbuzo 11 ukuya kumbuzo 14.
- Kwidrama nga**NYE** kubuzwe imibuzo emibini; **omde** kunye **nomfutshane**.
- Khetha umbuzo ube **mnye** kwidrama **oyifundisiweyo**.

KHUMBULA: Ukuba umlingwa ebekhethe umbuzo omfutshane kwicandelo B, **UNYANZELEKILE** ukuba akhethe umbuzo omde kwicandelo C. Ukuba umlingwa ebekhethe umbuzo omde kwicandelo B, **UNYANZELEKILE** ukuba akhethe umbuzo omfutshane kwicandelo C.

Ubude bombuzo omde buphakathi kwama-340 nama-390 amagama.

UMBUZO 11: (Umbuzo omde)

A- a – a! JONGUMSOBOMVU: B. B. Mkonto

Ngqina ngokubonisa ngezehlo ezikule ncwadi ukuba iinjongo zabamhlophe zokushumayela ivangeli kaKrestu yayingekokuxwilela nje kuphela iingqondo zabamnyama kule nkolo, koko yayikukurhwaphiliza umhlaba wabo nobutyebi bawo bengaqondwa.

[25]

OKANYE**UMBUZO 12 (Umbuzo omfutshane)**

Funda ezi zicatshulwa zilandelayo uze uphendule imibuzo esekwe kuzo.

ISICATSHULWA 1

QUKA: Njengokuba kusithiwa nje niyabalela abantu ukuba basile iindywala zabo benze namadini abo ngenxa yokuhlonela abo baleleyo, uthini wena?

FILIPHU: Khumbula kaloku mhlekazi ukuba abantu bayakhohlwa kukuthatha izinto bazibeke ngale ndlela bakholwa yiyo bona. Akuthiwa abantu mabangonwabi, hayi. Kungatshiwo nokuthi abantu mabangasili iindywala zabo ngokuzonwabisa, kodwa ukho umahluko ekuseleni ngengqiqo nangendlela eyiyo nasekuseleni uzibhubhisa. Bambi ke abantu baye bathi ngenxa yeza ndywala ubone ukuba ayikho enye into engenye abaya kuthi bayenze, kuphela **kukujikeleza apha elalini behamba besela**, ndaweni yokwenza imisetyenzana yekhaya. Yiloo ndawo ke le siyilwayo ebantwini.

QUKA:	Unyanisile ke kuloo ndawo. Yenye yezinto endingadibani kakuhle ngayo nenkosi le yam yeziyunguma. Silwa kube mdaka iisali kuba kaloku yona ithanda ukubona abantu bengena bephuma apha ngenxa yezi ndywala zingapheliyo, ndaweni yokuquqa emasimini nasendle. Ndiyabona ukuba singadibana nale nto niza nayo. Khanide ke nisebenze apha ebantwini, nibafake loo mhlabele, mhle, kunjalo nje uya kusiphucula esi sizwe sifumane uzuko nakwezinye izizwe.
RUFUS:	Ungalibali ke mhlekazi ukuba, mna ndiza nezinto oza kuthi wakuzibona, uzive nawe ukuba ngenene awuzilahlekisanga nesizwe sakho. (<i>Uvula ityesi ebithwelwe ngabasebenzi bakhe ababini</i>) Khangela le tyesi yam, bubutyebi bodwa obu ububonayo. (<i>Ukhupha ihempe nebrukhwe yekhaki</i>) Ziimpahla ezi sizinxibileyo. Ndiyakupha, zezakho ezi mhlekazi. Lo mnqwazi, ungakunceda kula malanga ale ndawo. Kanti ke ndiyazi ukuba kweli cala anikaziboni ezi zethu izixhobo zokulwa, khangela le yethu intonga, (<i>Ukhupha umpu</i>) Ndiyakwazi ukubetha into ikude ngayo. (<i>Uyawungxala bebukele abanye, adubule iinkukhu ebezicholachola kude phaya</i>)
QUKA:	Hi bafondini! Kade ndisiva ke ngalo mbayimbayi ushiya izigede. Uyabona baw' uMngxongo ukuba utshaba lwakho ulubetha lusekude phaya, uqengqe ugodo. Nazi ke izinto endizifunayo mna kwesi sizwe, impucuko nokuxhobisa esi sizwe, siyeke ukunyeliswa njengamatyutyusi.

- 12.1 Xela ukuba intetho kaQuka ekrwelelwe umgca ngaphantsi ibhekisa koobani? (1)
- 12.2 Thathela kule ntetho kaQuka yokuqala kwesi sicutshulwa uze unike uhlobo lwesimo sentlalo sale ndawo. (1)
- 12.3 Ukwenziwa kwamadini ngabantu abathile ingaba kubonisa yiphi kwezi zilandelayo. Khetha impendulo echanekileyo:
- 12.3.1 Ubutyebi
- 12.3.2 Inkubeko
- 12.3.3 Ishwangusha (1)
- 12.4 Nika igama elinye neliya kuthetha into etolikwa ngamagama abhalwe ngqindilili kwintetho kaFiliphu. (1)
- 12.5 Chaza ukuba yintoni le bangavisisani ngayo uQuka nenkosi yakhe. (2)
- 12.6 Uyavumelana na nale ndlela uQuka ayibona ngayo impucuko? (1)
- 12.7 Ucinga ukuba uQuka wabamkela aba bamhlophe? Zixhase ngokucaphula apha kwisicutshulwa. (2)
- 12.8 Nika igama lale nkosi yabulawa nguQuka. (1)
- 12.9 Ucinga ukuba yintoni injongo yokuba uQuka anikwe ezi zixhobo zempucuko? (1)

ISICATSHULWA 2

FILIPHU: Kwakuhle ke oko Kholoneli. Ndiyaphinda ukubethelela into yokuba le ndaba yale ncwadi mayibe yeyakwamkhozi. Nomrhwebi lo andingengweni ukuba ayive kuba lilopholopho. Ndisitsho nje ndimbona esiza nganeno apha namahlakani akhe orhwebo.

SOMERSET: Kaloku Gqirha ukuba linokudula eli hlebo lethu, ndingamangalelwa yinkundla yasemkhosini, ndivalelwe, ndigxothwe kungenjalo ndifumane ukuxhonywa. **Esi senzo sifana nokuvukela umbuso.** Kodwa ke sinokuthini ukungasenzi? Silangazelela uxolo kule mimandla ukuze nani nize kushumayela ningenaloyiko lakuhlaselwa zezi ndlavini. Mna ke ndidinwe ngala magazi amsulwa ankencenzeza kule mimango. Lelona cebo eli. (*Uyangena uRufus*) Kutheni? Wamaphikana?

RUFUS: Ndothuswa zezi nqwelo zingakaya. (*Esalatha phandle*) Akhululwe onke amakhoboka. Akagqejwanga nje kuphela, abulewe ehleli amafama. Ndibhidwe ngoku ngala siza nawo, afike apha aya kuzinyhala kwamanye. Ndicela uGqirha lo aye kundicengela phaya kuwo, awabonise umonakalo aza kuwenza ngokungasincedisisi siwahlawula ngokuncumisayo.

FILIPHU: Andingethandi ukuba sibuyele kuloo ngxoxo mnumzana uRufus. Ngumthetho osekiweyo ngoku lowo. Ukuba unomqeshwa wakhe, intlawulo iya kuphuma ngokufanelekileyo nangemvisiswano phakathi kweso sibini. Kodwa akukho bani unagunya kubomi bomnye umntu. Yiya wena ngokwakho kubantu bakho, ubacenge nje ngomqeshi kumqeshwa. Ukuba uya ngegunya lobuThixo kwikhoboka chitha utyiwe.

- 12.10 Yahlula aba babini, Filiphu kunye noSomerset ngokwendima abayidlalayo. (2)
- 12.11 Chaza ukuba ngokwendima ayidlalayo uFiliphu uyayingqina na le nto ayiyo. Ewe / Hayi, uzixhase. (2)
- 12.12 Cacisa le ntetho yesi sithethi ibhalwe ngamagama angqindilili. (2)
- 12.13 Xela ukuba le leta athetha ngayo uFiliphu ithini. (1)
- 12.14 Abhekisa kubani amazwi akrwelelwe umgca ngaphantsi kwintetho kaFiliphu? (1)
- 12.15 Yinyani okanye asiyonyani xa uSomerset esithi, "... ukuze nani nize kushumayela ningenaloyiko lakuhlaselwa zezi ndlavini"? Zixhase. (2)
- 12.16 Xela ukuba le ncoko yaba balinganiswa iqhubeka phi? (1)
- 12.17 Chaza ukuba ezi nqwelo athetha ngazo uRufus kwintetho yakhe zezantoni? (2)
- 12.18 Caphula kwintetho kaSomerset yokuqala amazwi abonisa ukuba uRufus imothusile into yokukhululwa kwamakhoboka nokubulawa kwamafama. (1)

UMBUZO 13 (Umbuzo omde)**AMAZA: Z. S. Qangule**

Kuyacaca ukuba umbhali xa ethiya igama umlinganiswa sukube enento afuna ukuyityhila malunga nomxholo. Bonisa indlela azotywe ngayo uNamhla ekuncediseni ukuwufezekisa umxholo.

[25]**OKANYE****UMBUZO 14 (Umbuzo omfutshane)**

Fundisisa le ncoko ilandelayo wandule ukuphendula imibuzo esekwe kuyo kwizicatshulwa zozibini.

ISICATSHULWA 1

LIZO: (*Esiya ngasefestileni.*) Ziinyanga ilizwi ulikhuphele imixhadi, ngunyaka wonke iinyembezi uziphalaza ucela amawenu ukuba angakutshatshi noSidima. Kodwa sekunjalo iinyembezi zakho ziwa njengamanzi entlabathini. (*Ejika emjonga*) Ingaba usaboyikela ntoni ububi obunokuvelela uziqhelile nje iintolo zabo?

NAMHLA: (*Esiya kuchopha ebhedini*) Utsho usithini?

LIZO: (*Esondela kuye*) Nditsho ndisithi qina, masilungise, utyhafo nobutyeketyeke mabukhwelele.

NAMHLA: (*Emhlalisa emgona*) Masingangxami siziphose kudaka esakuthi sizikhupha kulo sibe sitshona kwakulo.

LIZO: (*Engqengqa*) Bendingazi ukuba singathintelwa zizidenge zamaqaba kwiinjongo zethu.

NAMHLA: **Intsomi yakwaXhosa ithi izitunxa zabeka ilityekazi endleleni, nkqi zoyiswa kukulisusa izilumko!**

LIZO: Kanene lo Sidima uza kuhlala ixesha elingakanani emva kwaloo nomgogwana womtshato?

NAMHLA: Iinyanga zimbini qwaba, abuyele eRhawutini.

LIZO: Kanene wenza msebenzi mni?

NAMHLA: Ukwii-ofisi zeedompasi kufutshane nemigodi.

LIZO: Ukuba ubuye engawelwanga ngumgodi, uya kufika edilikelwe yindlu.

NAMHLA: Kuwa into ebimile.

LIZO: Niza kutshatiswa ngubani?

14.1 Xela ukuba isifaniso esisetyenziswe kwintetho yokuqala kaLizo siphuhlisa ntoni.

(1)

- 14.2 Nika intsingiselo yegama “udaka” ngokwesi sicutshulwa. (1)
- 14.3 Chaza ukuba intetho ebhalwe ngqindilili kaNamhla ibhekisa koobani. (2)
- 14.4 Nika igama lomntu oza kutshatisa uNamhla noSidima. (1)
- 14.5 Ngubani owangena ngequbuliso esi sibini sisazihlalele kamnandi ngokwesi sicutshulwa? (1)
- 14.6 Ingaba le ncoko yesi sibini iqhubeka phi? (1)
- 14.7 Caphula igama elibonisa ukudeleka kwalo mtshato kaSidima noNamhla. (1)
- 14.8 Cacisa le ntetho kaLizo “Ukuba ubuye engawelwanga ngumgodi uya kufika edilikelwe yindlu.” (2)
- 14.9 Ingaba azaliseka la mazwi angasentla esi sithethi? Ewe/ Hayi uzixhase. (2)
- 14.10 Bhala igama elikwesi sicutshulwa elitolikwa yile nkcaza: Incwadi eyayinguntamnani kumntu omnyama ngexesha lengcinezelo. (1)
- 14.11 Anyanisile na amazwi kaNamhla athi, “Kuwa into ebimile”? Zixhase. (2)

[15]

ISICATSHULWA 2

SIDIMA: (*Ejonga kuDuma, emgquma ngeragi yakhe*) Andazi nokuba mandithi sala nokuba mandithi hamba na mfo wethu. Ngoku ndisele ndedwa, inxenye yam ibunile. Mandla mani na angaphefumlela olu dongwe, lubuye luggadaze, lungqishe, luthethe. Ithunzi lokufa liggithe ngakum ladlula nawe. Akwaba ilifu besilifunqule ngaxesha-nye ukuze lakusilahla siyihambe kunye loo ndlela inxaphisayo. Siwaqabele kunye loo maqhina angquzulanayo, sehle sixhasene kwezo ngxondorha zisinekileyo, siphume kunye kwezo ntsunguzi zamahlathi kaMtyholi. Sikhwazane xa sixwesaxwesa kuloo maxethuka, sigonane kaloku xa silufincayo uhambo lwethu. Ngala mazwi ke mfo wethu ndiyakubulisa. **Kungoku nje ndiyahamba kuba ndibaleka imbumbulu eyahlala ikrobile. Ndisaba isibham esahlala siqhumisa.**

ZODWA: (*Esogquma uZodwa waseBhayi ngeragi yakhe*) Ngelokuncama ke sithi kugqityiwe. Thina benyama asinamandla akwenza nto, sicela uMesiya anivulele kumnyango wamazulu, anihlanganise nabo basindisiweyo. (*Uwe umkhusane*)

- 14.12 Khetha kwesi sicutshulwa ibinzana elitolikwa zezi nkcaza zilandelayo:
- 14.12.1 Ukuphinda kubuyiselwe ubomi.
- 14.12.2 Ukubambisana / ukusebenzisana ngamaxesha eenzima. (2)
- 14.13 Nika esona sizathu sokuba aba babini badutyulwe? (1)

- 14.14 Chaza ukuba amazwi akwisivakalisi sokuqala kwintetho kaSidima azoba mfanekiso mni ngaye. (1)
- 14.15 Tshatisa igama eliKULUHLU A eliya kuthi linike intsingiselo enye nelo liKULUHLU B ngokwakwiscatshulwa. (3)

ULUHLU A**ULUHLU B**

14.15.1 Udongwe	A Ukufa
14.15.2 Ilifu	B lingxaki / iinzima
14.15.3 Iintsunguzi	C Umzimba

(3)

- 14.16 Ingaba intetho kaSidima ebonakaliswe ngamagama abhalwe ngqindilili ibethelela luvo luni? (1)
- 14.17 Xela ukuba ngokwesi sicutshulwa sesibini ungathi kuxa likweliphi inqanaba lesakhiwo eli bali. Xhasa impendulo yakho. (2)

[10]**AMANQAKU ECANDELO C: 25****AMANQAKU EWONKE: 80**